



TEKS UCAPAN

**YB TUAN HAJI KHALID BIN ABD. SAMAD
MENTERI WILAYAH PERSEKUTUAN**

SEMPENA

**SAMBUTAN HARI ALAM SEKITAR NEGARA (HASN)
PERINGKAT KEBANGSAAN, 2019**

TAMAN PUDU ULU, CHERAS, KUALA LUMPUR

19 OKTOBER 2019 (SABTU) / 9.30 PAGI

Yang Berhormat Puan Yeo Bee Yin
Menteri Tenaga, Sains, Teknologi, Alam Sekitar dan Perubahan Iklim
(MESTECC)

Yang Berbahagia Datuk Ibrahim bin Yusoff
Pengarah Eksekutif (Pembangunan Sosioekonomi)
Dewan Bandaraya Kuala Lumpur

Yang Berusaha Dr. Nagulendran Kangayatkarasu
Timbalan Ketua Setiausaha
Kementerian Tenaga, Sains, Teknologi, Alam Sekitar dan Perubahan
Iklim (MESTECC)

Yang Berusaha Puan Norlin Bt. Jaafar
Ketua Pengarah
Jabatan Alam Sekitar

YBhg. Tan Sri, Datuk Seri, Datuk-Datuk, Tuan-Tuan dan Puan-Puan,

Para Hadirin yang dihormati sekalian,

Assalamualaikum Warahmatullah hi Wabarakatuh

Salam Sejahtera dan Salam “Sayangi Wilayahku”

1. Alhamdulillah, setinggi-tinggi kesyukuran dipanjatkan kepada Allah SWT kerana dengan rahmat dan izin-Nya jua dapat kita berkumpul dalam **Majlis Perasmian Sambutan Hari Alam Sekitar Negara**

(HASN) Peringkat Kebangsaan 2019 dalam suasana pagi yang penuh ceria ini.

2. Terlebih dahulu, saya ingin menzahirkan ucapan tahniah kepada kedua-dua Kementerian yang telah berganding bahu untuk menganjurkan majlis yang penuh bermakna ini. Saya difahamkan acara sambutan di peringkat Kebangsaan merupakan yang **pertama kali diadakan dalam era kepimpinan Kerajaan Baharu.**
3. Saya juga sangat teruja dan terharu di atas kehadiran para pengunjung khususnya warga kota ke Taman Rekreasi Pudu Ulu, Cheras, Kuala Lumpur bagi meraikan HASN 2019 dengan penuh **semangat kecintaan terhadap alam sekitar.**

Para hadirin yang dihormati sekalian,

4. Hari Alam Sekitar Negara (HASN) merupakan acara tahunan yang telah disambut semenjak tahun 1989 dan pada ketika itu ia dikenali sebagai Minggu Alam Sekitar Negara serta disambut pada tanggal 21 hingga 27 haribulan Oktober. Seiring dengan peredaran zaman dan perkembangan semasa, Minggu Alam Sekitar Negara telah **dijenamakan semula pada tahun 2016 dan kini ia dikenali sebagai Hari Alam Sekitar Negara atau ringkasnya “HASN” dan disambut pada setiap 21 haribulan Oktober.**
5. Penetapan satu hari yang khusus bagi sambutan di seluruh negara melambangkan **semangat kebersamaan** dalam mengharungi cabaran pengurusan alam sekitar yang semakin kompleks. Selain

itu, menjadi hasrat pihak Kerajaan agar **kewujudan hari “perayaan alam sekitar”** ini dapat dirasakan dan diingati oleh setiap rakyat Malaysia sebagaimana sambutan hari-hari peristiwa yang lain seperti Hari Malaysia, Hari Sukan Negara, Hari Sungai Sedunia dan sebagainya..

6. Seperti mana sebelumnya, HASN pada tahun ini masih mengekalkan tema **“Alam Sekitar, Tanggungjawab Bersama”**. Tema ini membawa maksud yang sangat signifikan iaitu setiap daripada kita memikul tanggungjawab untuk memelihara alam sekitar dengan sebaik mungkin. Tanggungjawab ini tidak hanya digalas oleh pihak Kerajaan semata-mata, malah **masyarakat kita juga perlu berubah ke arah kehidupan yang membudayakan kebersihan dan penjagaan alam sekitar**.

Para hadirin yang dihormati sekalian,

7. Hari Alam Sekitar Negara (HASN) Peringkat Kebangsaan pada tahun ini kita adakan di Taman Pudu Ulu, Cheras, Kuala Lumpur iaitu sebuah taman rekreasi awam yang terletak di tengah-tengah kepesatan bandaraya Kuala Lumpur. Pemilihan lokasi ini adalah amat bertepatan dalam usaha **mempromosi taman-taman awam dalam bandar** sebagai salah satu daya tarikan pengunjung oleh Dewan Bandaraya Kuala Lumpur.
8. Pada kesempatan ini juga, jika boleh saya ingin mencadangkan agar nama taman rekreasi “Taman Pudu Ulu” dapat **dijenamakan semula agar namanya lebih memberi daya tarikan dan**

melambangkan unsur-unsur alami (nature). Sekaligus ia berupaya menarik lebih ramai warga kota untuk mengunjungi taman ini bagi aktiviti riadah di hujung minggu atau menjadi lokasi pilihan utama penganjuran pelbagai aktiviti yang berskala besar.

Para hadirin yang dihormati sekalian,

9. Selain usaha-usaha perlindungan alam sekitar secara arus perdana (mainstream) yang diterajui oleh MESTECC melalui Jabatan Alam Sekitar, pihak Kementerian Wilayah Persekutuan turut terlibat secara aktif dalam mendokong usaha-usaha ini iaitu melalui peranan yang dimainkan oleh tiga (3) Pihak Berkuasa Tempatan (PBT) iaitu Dewan Bandaraya Kuala Lumpur, Perbadanan Putrajaya dan Perbadanan Labuan. Justeru itu, Kementerian Wilayah Persekutuan telah menyusun-atur gerak kerja bagi memenuhi tema baharu **Kementerian iaitu “Wilayah Peduli, Harapan Dipenuhi”**. Tema baharu ini tidak akan dibiarkan berdiri sekadar kata-kata malah sedang diterjemah melalui enam (6) teras utama iaitu meliputi:

- (i) Wilayah bersih;
- (ii) Keselamatan awam;
- (iii) Pengangkutan efisien;
- (iv) Sosio-ekonomi mampan;
- (v) Persekitaran hijau; dan
- (vi) Komuniti inklusif.

10. Seiring dengan teras yang kelima iaitu persekitaran hijau, projek pemuliharaan alam sekitar iaitu *River of Life, ROL* telah dimulakan pada tahun 2011 sehingga 2020 iaitu bagi mentransformasi Lembangan Sungai Klang merangkumi lapan (8) batang sungai (Sungai Klang, Sungai Gombak, Sungai Batu, Sungai Jinjang, Sungai Keroh, Sungai Kerayong, Sungai Ampang dan Sungai Bunus) kepada sungai yang berfungsi sebagai “Nadi Kehidupan”. Projek *River of Life, ROL* merupakan inisiatif Kerajaan untuk memastikan **sungai-sungai dalam kawasan perbandaran iaitu bagi jajaran Sungai Klang dan Sungai Gombak sejauh 10.7 km dapat dibaik pulih dan ditingkatkan kualiti airnya dari Kelas 3 kepada Kelas 2 (sesuai bagi kegunaan rekreasi), menjelang tahun 2020**. Ia dilaksanakan melalui program-program tertentu di bawah komponen pembersihan sungai yang diterajui oleh Jabatan Pengairan dan Saliran (JPS).

Para hadirin yang dihormati sekalian,

11. Dalam mencorak pembangunan masa hadapan Kuala Lumpur, elemen pengurusan alam sekitar secara lestari turut menjadi antara dasar Dewan Bandaraya Kuala Lumpur dalam menggubal Pelan Struktur Kuala Lumpur dan Pelan Tempatan Kuala Lumpur. Pada masa kini, usaha-usaha ke arah mempersiapkan Pelan Pembangunan Kuala Lumpur (PPKL) 2040 sedang dilaksanakan. Langkah ini jelas membuktikan bahawa aspek perancangan bandar di Kuala Lumpur masih mengekalkan **keseimbangan antara pembangunan fizikal dan pemuliharaan alam sekitar**.

12. Di samping itu, bagi menyokong usaha-usaha yang diterajui oleh MESTECC dalam menangani kesan perubahan iklim dan sasaran pengurangan intensiti pelepasan karbon dalam Keluaran Dalam Negara Kasar (KDNK) sebanyak 45 peratus menjelang 2030, Dewan Bandaraya Kuala Lumpur sedang melaksanakan beberapa program di bawah **Pelan Induk Masyarakat Karbon Rendah Kuala Lumpur 2030**. Pelan ini mensasarkan pengurangan pelepasan karbon di bandaraya Kuala Lumpur sebanyak 70 peratus menjelang 2030. Antaranya termasuk menukar semua lampu jalan kepada lampu LED, memasang peralatan cekap tenaga, menanam lebih banyak pokok serta mengalakkan orang ramai untuk berjalan dan berbasikal di bandar.
13. Kita juga sedar bahawa ancaman penggunaan plastik konvensional dan polisterin banyak memberi kesan negatif terhadap kesihatan dan alam sekitar. Beg plastik konvensional yang biasa kita gunakan selama ini mengambil masa beratus-ratus tahun untuk terurai. Justeru itu, **Kementerian Wilayah Persekutuan turut melaksanakan inisiatif penggunaan produk biodegradasi dan “compostable” di seluruh Wilayah Persekutuan meliputi Kuala Lumpur, Putrajaya dan Labuan**. Selain itu, penguatkuasaan larangan penggunaan straw plastik akan dilaksanakan bermula **1 Januari 2020**. Inisiatif-inisiatif ini, tidak lain tidak bukan, adalah untuk bersama-sama memelihara alam sekitar kerana isu pencemaran alam sekitar ini merentas sektor dan bidang kuasa pelbagai Kementerian.

Para hadirin yang dihormati sekalian,

14. Sebelum saya mengakhiri ucapan saya, izinkan saya mengungkapkan satu pesanan orang bijak pandai yang sering kita dengar, tetapi sering juga kita terlupa, iaitu **“Kita bukan mewariskan alam sekitar kepada anak cucu kita, tetapi kita meminjamnya dari mereka“**. Maka peliharalah alam sekitar dan sumber alam semulajadi yang diamanahkan ini dengan secermat mungkin agar anak cucu kita nanti dapat menikmatinya.
15. Akhir kata, sekali lagi tahniah kepada kedua-dua Kementerian dan jawatankuasa penganjur yang telah bertungkus lumus untuk memastikan majlis ini berjalan dengan lancar dan mencapai objektifnya. Penghargaan juga kepada semua agensi kerajaan, pihak swasta, Badan-Badan Bukan Kerajaan (NGO), komuniti setempat dan pihak-pihak lain yang terlibat . Tidak lupa juga kepada rakan-rakan strategik yang turut sama menjayakan acara ini.
16. Dengan lafaz **Bismillahirrohmanirrohim**, saya dengan sukacitanya merasmikan **Sambutan Hari Alam Sekitar Negara (HASN) Peringkat Kebangsaan, 2019**.

Sekian.

Wabillahi Taufik Walhidayah

Wassalamu'alaikum W.B